

В ЧЕТВЕРГ 5-Й СЕДМИЦЫ ПО ПАСХЕ
В СРЕДУ ПЯТЫХ СЕДМИЦЫ ПО ПАСХЕ ВЕЧЕРА,

На Господи воззвах: поставим стихов 6, и поем о самаряныне. Глас 4-й:

Подобен: Званный свыше:

На кладязе Христос самаряныню обрет, проси воду пити от нея, жаждай сея исправления и спасения, еже и уразумесе дела исполняемое. Сию бо влекущую питье, пития Сам извлекает, и пития исполняет живущаго, согражданом возвещающую: се древле в законе реченный Мессиа Христос, явися яко Человек, мыслей сокровенных открывая неизреченная.

Се Мессиа Христос, сущим во граде, на земли явися, самаряныня глаголет: написанный приити, иже содеянная мною сказа, и яже во глубине сердца моего сокровенная, вся мне рече, яко соверших. Темже град стекшийся видит словеса ея, по всему истинствующая, и вещи удивляется, и уверяется видению.

Тебе в шестый час, яко Владыку иногда в рай ходяща Бога, праматерняя виде дщи паки, в час шестый тако сядяща, идеже источник воды, и кладенец ископая, и от нея просяща пити, яко да водою сию напоиши жизни нетления, еже и содеяся: Твоя бо живоносная воды, она изобильно напившись, и во граде пропевае водное богатство.

И Миней, 3.

Слава, и ныне: глас 1-й:

На источник пришел еси, источниче чудес, в шестый час, Евин уловити плод: Ева бо в той изыде из рая, прелестию змиевою. Приблужи бо ся самаряныня почерпсти воду, юже виде рече Спас: даждь Ми воду пити, и Аз воды текущая насыщу тя. И во град текши целомудренная, народом возвести абие: приидите видите Христа Господа, Спаса душ наших.

На стиховне стихиры Осмогласника, глас 4-й:

Врата адова сокрушил еси Господи, и Твоею смертию смертное царство разрушил еси: род же человеческий от ислечения свободил еси, живот и нетление миру даровав, и велию милость.

Стих: К Тебе возведох очи мои:

Апостольский лик, Духом Святым просветил еси Христе, и нашу скверну греховную теми отмый Боже, и помилуй нас.

Стих: Помилуй нас Господи, помилуй нас:

Мученичен: Имуща дерзновение ко Спасу святии, молитесь непрестанно за ны грешныя, оставление прегрешений просяще, и душам нашим велию милость.

Слава, и ныне: глас 2-й:

На студенец яко прииде Господь, самаряныня моляше Благоутробнаго: подаждь ми воду веры, и прииму купельныя воды, радование и избавление. Животодавче Господи, слава Тебе.

Таже, **Н**ыне отпускаеши: По Отче наш:.

Отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергну, апостолом хвалящаяся, глаголаху: исповержеся смерть, воскресе Христос Бог, даруяй мiрови велию милость.

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне, Богородичен, глас 4-й]

И отпуст.

В ЧЕТВЕРГ 5-Й СЕДМИЦЫ ПО ПАСХЕ
В ЧЕТВЕРТОК 5 СЕДМИЦЫ ПО ПАСЦЕ, НА УТРЕНИ,

На **Бог** Господь: тропарь воскресен, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергнуши, апостолом хвалящаяся, глаголаху: исповержесе смерть, воскресе Христос Бог, даруяй миру велию милость. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне; Богородичен, глас 4-й]

По 1-м стихословии, седален, глас 4-й:

Подобен: Вознесыйся на Крест:

Распныйся нас ради волею, и вменен быв в мертвых Животодавче, и воскрес тридневно Христе Боже наш, сокрушил еси силою Твоею смерти державу, всех востанием Твоим сущих во аде ожививый. И воспевающе чтем Твое востание вси, бессмертне Господи.

Стих: Во всю землю изыде вещание их и в концы вселенныя глаголы их.

Подобен: Скоро предвари:

Светила в концев ученики Твоя, Спасе, показал еси сияюща Твоим проповеданием, просвещающая души наша: прелесть идольскую теми омрачив, учеными благочестия просветивый мир. Тех молитвами спаси души наша.

Стих: Дивен Бог во святых Своих, Бог Израилев:

Мученичен: **К**рестом вооружившеся страсотерпцы Твои, победиша козни злоначального врага, Христе Боже наш: возсияша яко светила, человеки наставляюще, подают исцеления верою просящим. Тех молитвами спаси души наша.

Слава, и ныне: Крестобогородичен:

Дево Пренепорочная, Преплагаго Бога рождающая, со апостолы Того непрестанно моли, оставление прегрешений, и исправление жития подати нам, прежде конца, верою и любовию воспевающим Тя по долгу, единая Всепетая.

По 2-м стихословии седален, глас 6-й:

Подобен: Упование миру:

Яко верней самаряныне Господи, Божества Твоего источник отверзл еси, и излиал еси богоразумие на ню, напоая питием богоприятным: и ныне всем нам низпосли прегрешений очищение Преплагий. [Дважды.]

Воскресение Христово видевше: псалом 50.

Канон самаряныни, со ирмосом на 8: И Миней на 4. Глас 1-й:

Песнь 1.

Ирмос: Поразительный Египта, и фараона мучителя погрузивший в море, люди спасл еси из рабства Моисейски поющих песнь победную: яко прославился.

Погребенный воста, Собою воздвиге род человеческий: да радуется тварь вся, и мысленно днесь облацы да кропят правду яве.

Крест вольный плотию прием, тридневен воскрес еси от мертвых, адова сокровища Живоначалниче Господи истощив, и извед окованные души.

Зраком блистающая муносицы видевше ангела, страхом бежаша от гроба: Христово же Восстание уведевше, и возвестити тщатся учеником.

Покрываяй водами превыспренняя Господи, Вода жизни Сый, самаряныне, просящей Твоя честная воды, подал еси разумевшей благоустройство Твое.

Троицен: **О** Троице, верую Тя чистою славящих, Отче, Сыне и Душе, яко Творец всех спасай, и очищение даруй нам грехов, яко Преподобный.

Богородичен: Радуйся, Престоле огненный. Радуйся, Свещниче всезлатый. Радуйся, света Облаче. Радуйся, Палато Слова, и умная Трапезо, Хлеб жизни достойно Христа носившая.

И святого Минея на 4.

Катавасия: Воскресения день ...,

Песнь 3.

Ирмос: Утвердися сердце мое в Господе, дающем молитву молящемуся, яко лук сильных изнеможе, и немощствующий препоясашеся силою.

Волею на древо вознесся еси Слове, и зрящее распадохуся камене, и тварь преклоняшася вся, и мертвии из гробов, якоже от сна востаху.

С душою Тя пришедша ко аду, Слове, видевше вся души праведных, от вечных уз отрешахуся, песнословяще яже паче ума силу Твою.

Что чудитесь? Что во гробе вы ищите с мром жены, Владыку? Воста, и мир совоздвиге, ангел блистайся муносицам вещае.

Жизнь сый Господи, и Источник безсмертия, сел еси при источнице Щедре, и Твоих премудрых вод исполнил еси самаряныню просящую, и поющую Тя.

Троицен: **Е**дин над всеми в Троице Бог поется, Отец и Сын и Божественный Дух, Егоже страхом славят Небеснии чинове, ясно вопиюще: Свят, Свят, Свят еси Господи.

Богородичен: **Н**есказанно зачехши во утробе Твоей всех Бога, Дево Мати, паче мысли и слова родила еси, пребывши Дева яко прежде Рождества, Богоневесто.

И святаго Минея на 4.

Катавасия: Приидите, пиво пием новое ...,

Кондак и седален святаго.

Слава, и ныне: глас 4-й:

Подобен: Вознесыйся:

Да радуется небо, да ликовствует земная, яко Христос от Девы явився яко Человек, избави из тления все человечество Своею смертию: чудесы же возсиявый жене самаряныне воды просящей, подает источник исцелений, яко Един Безсмертен.

Песнь 4.

Ирмос: Услышах Боже слух Твой, и убояхся, разумех дела Твоя, и ужасохся, Господи: яко Твоего хваления исполнь земля.

Небеса да веселятся, да празднует тварь вся, воста Господь, и явился всем премудрым апостолом Своим.

Пожерта бысть смерти твоя сила, Христу умершу, мертвии яко от чертогов, востанием Сего от гробов изыдоша.

Что рыдаете, о жены? Что с муры ищете Безсмертнаго? Воста, якоже рече, муроносицам глагола ангел.

Самаряныни Господи, просившей подал еси воду, ведение державы Твоея: темже во веки не вжаждет воспевающи Тя.

Троицен: О Троице Пресущная, Отче и Слове, и Божественный Душе, Единосильне, Собезначальне! Спаси нас всех верою воспевающих Тя.

Богородичен: Неопалимую купину Тя законоположитель, зряще древле, Даниила же гору святую смотряще, едина Дево Мати Владычице.

И святаго Минея на 4.

Катавасия: На Божественней стражи ...,

Песнь 5.

Ирмос: Возсияй ми Господи свет повелений Твоих, яко к Тебе дух мой утренюет, и поет Тя: Ты бо еси Бог наш, и к Тебе прибегаю, Царю мира.

Гроб Твой святыи достигше уранше муроносицы, блистающася видеша юношу и ужасошася, Твоему научившеся Востанию Христе.

Смерть умертвися, ад пленися, сущии во узах свободишася Христовым Воскресением, возрадуимся и руками восплещим, празднующе светло.

Апостоли възграйте, и ангели ликуйте, земнороднии вси возрадуйтеся: Господь воскрес, тля испровержеся, и печаль преста, и ликовствует Адам.

Источник сый Господи Жизни, воду оставления и разумения даровал еси, жене просившей древле самаряныне. Темже воспеваем неиреченныя щедроты Твоя.

Единицу Триипостасную, Троицу Единосущную, Отца Слова и Духа Святаго, Нераздельна естеством Бога Единого почитаем, Творца и Господа и Владыку всех.

Богородичен: **Т**я дверь непроходимую, и Село невозделанное, и ковчег манну носящий, и ручку и свещник, и кадильницу невестственного угля, именуем Чистая.

И святого Минея на 4.

Катавасия: **У**тренюем утреннюю глубокоу ...,

Песнь 6.

Ирмос: **Д**а не погрузит мене буря водная, ниже пожрет мене глубина: отвержен бо есмь во глубины сердца морского зол моих. Тем зову яко **Иона:** да взыдет от тли зол живот мой к Тебе Боже.

На кресте Тя беззаконнии пригвоздиша, и кошием прободоша Христе, и Иосиф благообразный Тя погребе в новом гробе: из него же со славою воскрес, совоскресил еси Спасе, всю тварь поющую державу Твою.

Верей и врата Владыко, сильно сокрушил еси адовы, и воскресл еси яко Бог, и срет, радуйтесь, рекл еси женам, и сих рещи послал еси учеником: воста Живот, и виден бысть, просвещай концы.

Что плачете? Что носите яко смертному жены мур? Воста Христос, вопияше древле блистайся вельми, явлейся юноша, тщи плащаницы оставив: шедше возвестите другом Его Востание.

Струя сый Господи жизни независтная, и бездна милости Блаже, путешествовав седиши близ кладязя клятвенного, и самаряныни вопиял еси: даждь ми воду пити, яко да приимеши оставления воды.

Троичен: **П**ою Отца Безначальна, и Сына Сопрестольна, и Духа единосущна верно, Едино Существо, и Естество, и славу, и едино Царство Бога всех и Творца, Содержителя всего, со безплотными силами.

Богородичен: **Д**еву Едину рождающую, и утробу нетленную соблюдошу, поем Тя Чистая, Престол Господень, и дверь, и гору, и мысленный свещник, чертог всесветлый Божий, и сень славы яве, ковчег же и ручку и трапезу.

И святого Минея на 4.

Катавасия: **С**низшел еси в преисподняя земли ...,

Кондак самаряныни, глас 8-й:

Подобен: **Я**ко начатки:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

Икос: Чистая таинства услышим, Иоанну нас учащу, в Самарии бывшая: яко жене беседоваше Господь, воду просив, Иже воды в сонмища их собравый, Иже Отцу и Духу сопрестольный: прииде бо ищый образ Свой, вечно яко Приснославный.

Песнь 7.

Ирмос: Не предаждь нас до конца имене Твоего ради, и не разори завета Твоего, и не отстави милости Твоя от нас, Господи Боже отец наших, препетый во веки.

Со беззаконными Христе щедре волею вменился еси, во время Божественных страсти: и сия сия видяще колебашеся земля, и камене вседетельным мановением распадалеся Непостижимо, и восташа мертвии иже от века.

С душою спеш во страны преисподния ада, возвел еси мужеством связанных вся, яже от века смерть прият, горький мучитель, вопиющий Тебе: Иисусе Боже, слава Твоему страшному смотрению.

С мертвыми что вы ищете Живущаго во веки? Воста, якоже рече: се якоже видите праздны плащаницы, истощен гроб, явлейся глаголаше муроносицам юноша: скоро спешите рцыте апостолом.

Вода еси жизни, вопияше Христу самаряныня: напой мя убо Слове жаждущую всегда Твоя Божественная благодати, яко да не ктому, Иисусе Господи, неведения содержуся зноем, но проповедую Твоя величия.

Троицен: Отца и Сына, и Божественнаго воспеваем Духа, нераздельную Троицу естеством сущую, разделенну лица, едино Существо, срасленное, безначальное, Творца всех, и Бога: Егоже вси небеснии поют чинове.

Богородичен: По Рождестве страшнем, Дева чиста сохранилася еси, Святая Богородице: темже ты вси ангельстии лица, и человечестии роди вси, немолчными воспевают гласы, Вместилище Чистое Невместимаго.

И святаго Минея на 4.

Катавасия: Отроки от пещи избавивый ...,

Песнь 8.

Ирмос: Всяческая Владыко премудростию составил еси, землю же паки утвердил еси, якоже веси, дно, основанием водрузивый на водах безмерных: тем вси вопием воспевающе: благословите дела Господня непрестанно Господа.

Смерть претерпел еси, Едине Безсмертне волею, ада пленил еси, врата медная стерл еси Царю Небесный, и отъял еси узники от века тамо сущия, воспевающий державу Твоя благости.

Вознеслся еси Долготерпеливе волею на древо, и камене распадеся, и солнце угасе, и завеса церковная раздрася, и земля поколебася, и потрепета всепомянутый ад, и вся узники рзреша.

Явился еси Господи, во тме сидящим, Свет сый Незаходимый, и Живот всех. Темже Тя яко виде правденых сонм, възграся Слове, и возопи: пришел еси вся от уз разрешити, поющыя державу Твою.

Близ сел еси источника, в час Спасе шестый, и самаряныни воду живую подал еси, и разума воды за многое благоутробие. С неюже вси вопием воспевающе: благословите дела Господня непрестанно Господа.

Троичен: **О**тца Безначальна, Сына Собезначальна поем, и Духа Святаго, Бога Единого Трое, неслиянна, непресекома, Содетеля всех, единосильную Державу, самовластную, и вопием: благословите дела Господня, непрестанно Господа.

Богородичен: **У**глем очищается Исаия, предпроведуя мысленнаго Угля, воплощаема Дево из Тебе паче мысли, опаляюща человекa вся вещныя грехи, и обожаяща за милосердие естество наше Всенепорочная.

И святаго Минея на 4.

Таже: **Х**валим, **б**лагословим, **п**оклоняемся **Г**осподеви:

Катавасия: **С**ей нареченный и святыи день ...

Стихословится Честнейшую:

Песнь 9.

Ирмос: **С**отвори державу мышцею Своею, низложи бо сильная со престол, и вознесе смиренныа Бог Израилев, в нихже посети нас Восток с высоты, и направил ны естъ на путь мира.

Се виден бысть Живот всех Христос, повешен волею на древе: и сия видящи земля потрясеся, и многа святых восташа яве телеса усопшых, и узохранительница адова поколебася.

Красен из гроба яко Жених от чертога изшел еси, смерти разоривый мучительство Христе, и адовы веревы сокрушивый силою Божественною, и Востания Твоего, светом умным просветивый мир.

Поставим вси ныне лики духовныа, и да зовем: Господь воскрес, да радуется земля, да веселится небо, облацы да кропят нам правды тучы, празднующыа светло и Христа поющим.

Жизнь живущих, источник благих Господь, богато источая воду учений, вопиет жене: подаждь ми воду пити, яко да подам ти воду, грехов твоих источники изсушающую.

Троицен: Свет един нераздельно, Трисолнечная Единица, Безначальный Отец, Сын, и Дух, Божество едино, Жизнь и всех Творец. Того воспоим вернии со безплотными, трисвятыми песньми священнословающе.

Богородичен: Свету бывши жилище, Чистая, озари зеницы души моея, омраченныя многими козньми врага, и видети сподоби ясно от Тебе возсиявший Свет паче мысли, чистым сердцем.

И святого Минея на 4.

Катавасия: Светися, светися

Екзапостилларий самаряныни:

Подобен: Жены:

В Самарию пришел еси Спасе мой Всесильне, и жене беседовав просил еси воды пити, евреем воды источивый из камене несекомаго, юже к вере совосприял еси, и ныне жизни наслаждается на небесех вечно.

Слава и ныне, тойже:

На хвалитех поставим стихи 4. И поем стихиры Осмогласника, глас 4-й:

Отеческих Твоих недр не разлучився, Единородный Слове Божий, пришел еси на землю за человеколюбие, Человек быв непреложен, и Крест и смерть претерпел еси плотию, безстрастный Божеством: воскрес же из мертвых, бессмертие подал еси роду человеческому, яко един Всесилен. [Дважды.]

Некнижнѣя ученики Дух Твой Святыи наказатели яви Христе Боже, и многовещанным сличием языков прелесть упраздни, яко Всесилен.

Мученичен: Како вашим подвигом не удивимся святѣи мученицы, яко телом мертвенным обложени, безплотныя враги победисте? Не устрашиша вас мучительская прещения, ни ужасиша вас мук приложения, воистинну достойно от Христа прославистеся. Непрестанно молитесь спастися душам нашим.

Слава, и ныне: глас 2-й:

Собезначальный и соприисносущный Сын и Слово Отчее, на источник прииде, источник исцелений, и жена от Самарии прииде почерпсти воду, юже виде рече Спас: даждь Ми воду пити, и шедши пригласи твоего мужа. Она же яко Человеку глаголющи, а не Богу, утаити тщашеся, глаголаше: не имам мужа. И Учитель к ней: истину рекла еси, не имам мужа: пять бо имела еси, и ныне егоже имаши, несть твой муж. Она же о глаголе удивившися, и во град текши, народом вопиаше, глаголющи: приидите видете Христа, Иже дарует мирови велию милость.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне самаряныни, Глас 4-й:

Подобен: Яко добля:

Ты источник благодати сый и пучина, жизни же хранитель, едине Благоутробне, како жене самаряныне беседа възгласил еси: даждь Ми воду пити, яко да приимеши оставление: воспеваем Твое многое благоутробие, имже спасаеши человеческий весь род, за многую благодать.

Стих: Наляцы, и успевай, и царствуй, истины ради, и кротости, и правды.

Приидите видите Человека, Иже рече ми днесь на источнице седяй, что сотворих: Пророк бо истиннейший есть и превеликий, сокровенная и явленная ведый вся. Но даруй воду живу, юже подаеши жаждущим, да не вжажду паки во веки, Человеколюбче.

Стих: Возлюбил еси правду, и возненавидел еси беззаконие.

Источник приснотекущий, животе безсмертне, струя неистощаемая же и нетленная, путешествовав седяше близ кладязя, Своя ученики послав по брашно, беседоваше жене черплющей, сию хотя уловити, и просветити души ея очи.

Слава, и ныне: глас 3-й:

Да радуется днесь светло небо и земля, яко Христос явился воплощаемъ яко Человек, да Адама измет от клятвы всеродна, и удивляется чудеса в Самарию пришед: жене же беседоваше воды прося, Иже облаки водами одевай. Темже вси вернии поклонимся, нас ради волею Обнищавшему, благоутробным советом.

Таже, Благо есть исповедатися Господеви

Трисвятое. И по Отче наш:

Отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергши, апостолом хвалящаяся, глаголаху: исповержеся смерть, воскрес Христос Бог, даруй ми́рови велию милость.

Слава, и ныне: Богородичен, глас 4-й

Таже ектения: Помилуй нас Боже:

Час 1. И отпуст.

В ЧЕТВЕРГ 5-Й СЕДМИЦЫ ПО ПАСХЕ

На Литургии

Блаженна от канона самаряныни, Песнь 7-й, на 6:

Со беззаконными Христе щедре волею вменился еси, во время Божественных страсти: и сия сия видяще колебашеся земля, и камене вседетельным мановением распадалеся Непостижимо, и восташи мертвии иже от века.

С душею спеш во страны преисподния ада, возвел еси мужеством связанныя вся, яже от века смерть прият, горький мучитель, вопиющыя Тебе: Иисусе Боже, слава Твоему страшному смотрению.

С мертвыми что вы ищете Живущаго во веки? Воста, якоже рече: се якоже видите праздны плащаницы, истощен гроб, явлейся глаголаше муроносицам юноша: скоро шедше рцыте апостолом.

Вода еси жизни, вопияше Христу самаряныня: напой мя убо Слове жаждущую всегда Твоя Божественная благодати, яко да не ктому, Иисусе Господи, неведения содержуся зноем, но проповедую Твоя величия.

Слава: Троицен: Отца и Сына, и Божественного воспеваем Духа, нераздельную Троицу естеством сущую, разделенну лица, едино Существо, срасленное, безначальное, Творца всех, и Бога: Егоже вси небеснии поют чинове.

И ныне: Богородичен: По Рождестве страшнем, Дева чиста сохранилася еси, Святая Богородице: темже ты вси ангельстии лица, и человечестии роди вси, немолчными воспевают гласы, Вместилище Чистое Невместимаго.

По входе, отпустительный тропарь, глас 4-й:

Светлую Воскресения проповедь от Ангела уведевше Господи ученицы, и прадеднее осуждение отвергну, апостолом хвалящися, глаголаху: исповержеся смерть, воскрес Христос Бог, даруяй мірови велию милость.

И храма святого: И тропарь святого, аще есть. Аще ли будет и другаго святого тропарь, то рцы его: также кондак храма. Слава: святого. Аще ли будет и другаго святого кондак, такожде рцы его.

И ныне, кондак самаряныни, глас 8-й:

Верую пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

Прокимен, глас 3-й:

Прокимен: Пойте Богу нашему, пойте, * пойте Цареву нашему, пойте.

Стих: Все языцы восплещете руками, воскликните Богу гласом радования.

Апостол Деяний, зачало 35. [Деян. 14, 20–27.]

Во дни оны, изыде Павел с Варнавою в Дервию. Благовествоваста же граду тому и научиста мнози, возвратистася в Листру, и Иконию, и Антиохию: утверждающе души учеников, моляще пребыти в вере, и яко многими скорбьми подобает нам внити в Царствие Божие. Рукоположи же им пресвитеры на вся церкви, и помолившися с постом, предаста их Господеви, в Негоже вероваша. И прошедша Писидию, приидоста в Памфилию: и глаголаша в Пергии слово Господне, снискоша во Атталию. И оттуду отпыста во Антиохию, отнюдуже беста предана благодати Божией в дело, еже скончаста. Пришедша же и собравша церковь, сказаста елика сотвори Бог с ними, и яко отверзе языком дверь веры.

Аллилуиа, глас 4-й: Наляцы, и успевай, и царствуй истины ради, и кротости, и правды.

Стих: Возлюбил еси правду, и возненавидел еси беззаконие.

Евангелие Иоанна, зачало 35. [Ин. 9, 39–10, 9.]

Рече Господь ко пришедшим к Нему иудеем: на суд Аз в мир сей приидох, да невидящии видят, и видящии слепи будут. И слышаша от фарисей сия сущии с Ним, и реша Ему: еда и мы слепи есмы? Рече им Иисус: аще бысте слепи были, не бысте имели греха: ныне же глаголете, яко видим, и грех ваш пребывает. Аминь, аминь глаголю вам: не входяй дверьми во двор овчий, но прелазя инуде, той тать есть и разбойник. А входяй дверьми пастырь есть овцам. Сему дверник отверзает, и овцы глас его слышат, и своя овцы глашает по имени, и изгонит их. И егда своя овцы ижденет, пред ними ходит, и овцы по нем идут, яко ведут глас его: По чуждем же не идут, но бежат от него, яко не знают чуждаго гласа. Сию притчу рече им Иисус: они же не разумеша, что быше, яже глаголаше им. Рече же паки им Иисус: аминь, аминь глаголю вам, яко Аз есмь дверь овцам. Все, елико их прииде прежде Мене, татие суть и разбойницы: но не послушаша их овцы. Аз есмь дверь: Мною аще кто внидет, спасется: и внидет и изыдет, и пажить обрящет.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя

воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника безсмертнаго вкусите.